

Festa de sa mèndula



**Sàbudu 8 e
domìngu 9
de cabudanni 2012**

Si avisant totus is chi bolint pigai parti a sa sagra de sa mèndula, ca tocat a s'isciri aintru de sàbudu **1 de cabudanni 2012 (entro sabato 01.09.2012)** mandendi s'ischèda de ischridura cumpilada:

- cun sa posta a s'indiritzu:

Comune di Baressa - Via Is Tellaias n. 6-09090 Baressa (Or);

- po fax a su nùmeru: 0783.930118;
- cun dd'una email a:

protocollo@pec.comune.baressa.or.it;

- a manu portendidda a s'Ufficio Protocolu de su Comune.

A s'ischèda de ischridura tocat a alliongiari sa còpia de sa carta de identidadi valida.

Su logu aundi si ponni at a èssiri donau de su Comune sena pagai nudda.

Podint pigai parti a custa Sagra:

- a) is operadoris chi tenit arregulari licèntzia de cumèrciu e atividadis artenasas;
- b) is operadoris chi no tenit atividadis ma ponint in amostu cosas fatas de sa capassidadi cosa insoru mancai non ddu fatzant sempri;
- c) Is messàius chi produxint in is terras insoru e bolint ponni totu in amostu po ndi bendi.

Novas Baressesas at a bessiri prus o mancu una borta a su mesi e s'at podi arriciri inderetura in domu, cun una e-mail: bastat a ddu pediri mandendi una punta de billetu eletrònicu a s'indiritzu serviziocultura@comune.baressa.or.it iscriendi su nòmmini, su sangunau e "bollu arriciri *Novas baressesas*".

In prus, s'at podi ligi puru in su giassu internet de su comunu www.comune.baressa.or.it in sa setzioni de sa lingua sarda o agatai in medas atividadis comercialis de sa biddu o in sa biblioteca comunali



Sa redazioni de *Novas Baressesas* est contivigiada de su Servìtziu linguisticu sardu e de s'Assesorau a sa Cultura de su Comune de Baressa.

S'isportellu linguisticu est a disponimentu de tzitadinus, maistus de iscola, professoris e istudentis po cali si siat informatzioni, fundamentu, duda, crosidadi, bibliografia, sitografia asuba de sa lingua sarda, po consulèntzias didàticas e po contzillus chi pertocant is arrègulas de ischridura de su sardu.

Su Servìtziu in austu at a essi abertu:

	de	a
Mèrcuris 8	10.40	14.10
Giòbia 16	08.00	11.00
Mèrcuris 29	11.10	15.10



Comunu de Baressa
Provintzia de Aristanis

Novas Baressesas

☎ 0783-930049 Fax 0783-930118
e-mail: info@comune.baressa.or.it

Follu periòdicu de informatzioni istituzionali de su Comune de Baressa

**Responsabilidadi e proprietadi de su
Comunu de Baressa (or)**

Annu II, n. 6

Acabbau su 8 de austu de su 2012

**S'istadialli est bella meda,
ma tocat a gial atentu**

Gìogus in ludoteca

S'amministratzioni comunali fait sciri a totus is famillias chi tenint piciocheddus intra de ses e catodixi annus (6-14 anni) ca **cenàbura 10 de austu 2012** ant a inghitzai is atividadis de sa ludoteca. In is localis de s'ex asilu baressesu e in su parcu comunali inguni acanta **ònnia lunis e ònnia cenàbura** de is noioras a is ùndixi de mengianu s'ant a fàiri giògus cun sa bòcia, cun s'acqua e a scudras, ma fintzas traballeddus manigiendu coloris, carta e plastilina po s'ispassiai totus impari fintzas a su 10 de Cabudanni. **Po pigai parti a is atividadis tocat a s'isciri** aintru de cenàbura 10 de austu in s'Ufitziu anagrafi de su comunu nostu.



**Prus atentu,
prus pagu fogus**

Is fogus po s'isula nosta funt una de is arrexonis prus mannas de s'arrovina de is padentis e de is sartus nostus e funt fintzas unu perìgulu mannu meda po sa vida de is

personas. Ònnia annu, in Sardinnia prus de tremila fogus faint dannus mannus a su sartu e ponint in arriscu is proprietadis, is siendas, sa vida de genti meda e fintzas cussa de is animalis.

Duncas, in custa parti de *Novas Baresesas* eis a agatai is arrègulas de s'ighiri po fàiri abasciai su nùmeru de fogus chi podint fàiri e faint arrovinas mannas in is sartus nostus e chi ponint in perìgulu sa vida de sa genti.

Prima de su 15 de su mesi de làmpadas (prima del 15 giugno) tocat a fàiri:

- is doas de protetzioni;
- a pòniri in seguresa is terras de onniunu, lassendi una doa de tres metrus a giru a giru e fintzas me in is logus a làcana de is arrugas aundi passant màchinas, corrieras e càmion puru.
- po sa domu e is istaddas de is animalis sa doa de seguresa depit èssiri de cincù metrus.
- tocat a tènniri is terras pullidas de totu sa fustigalla e s'istupa sicada chi ddoi pòdiri èssiri.

Po su beni de totus tocat e a tènniri sa conca in su logu suu e a pentzai a cussu chi si fait: cun dd'unu pagheddu de atentu in prus si podint evitai fogus meda:

- tocat a castiai chi in is terras cosa nosta ddoi funt ainas o cali si siat cosa chi potzat pigai fogu o fai pampa;
- nc'est abisòngiu in cali si siat logu de tènniri is cosas chi serbint po intervènni luègus po istudai is fogus candu si nci fuint, comenti a una pompa po s'acqua, longa su tretu

bastanti po lompì in ònnia logu de su terrenu nostu o una ghisterra de acqua po no abarrai mai sena nudda.

Intra de su 1° de làmpadas e su 15 de su mesi de lodàmini (1° giugno – 15 ottobre) tocat a giai prus atentu poita est su tempus prus perigulosu ca nc'est basca meda e sa caloria ajudat su fogu.

Po custu non fait a:

- allui fogu perunu in su sartu;
- fulliai sa braxa mancai pargiàt istudada;
- fulliai de is finestrinus de sa màchina o de cali si siat logu zigarrus e sigaretas;
- lassai in terra alluminus, zigarrus o sigaretas e nimancu atras cosas allutas chi potzant fàiri iscapai su fogu;
- firmai sa màchina o cali si siat mezu acanta a istuas o molas sicadas chi podint pigai fogu cun fatzilidadi;
- Arrostiti o coxinai sa cosa de papai foras de is logus fatus apostu.



De su 1° de làmpadas a su 31 de su mesi de lodàmini totus custas cosas non si podint fàiri **e nc'est su divietu po lei.** Ma, mancai in s'ierru o in s'atòngiu su

divietu no nci siat, tocat a non ddas fàiri a su pròpiu poita su fogu si nci podit furi luegus e no est fàtzili a ddu firmai prima chi fetzat arrovinas mannas in sa terra nostra istimada.